

補註瘟疫論 卷三



補註瘟疫論卷之三

延陵吳有性又可甫著

鴛湖

洪天錫吉人尚友山人氏

補註

男道揆孫

校梓

濟玉燦

鎖肚

此即疫毒從口入胃
蹣結而不散者口嘔
七處紅赤為度則毒
四散肌表

小兒大小便閉腹脹欲死令婦人以溫水漱口吸嘔兒
前後心并臍下手足心共七處每一處凡三五次漱口
吸嘔取紅赤為度須臾自通凡兒有此症知此法可得
再生

旺河

人無病或坐或卧或酒席間或酒後陡然卽死者爲軀
河將本人口用鐵物捎開以簪刺舌上兩傍小青筋血
出卽活切不可刺舌下正中處

棺材疔

起於舌下見宜早治遲則殺人皂礬一味不拘多少爲
末吹之卽愈

喉管傷寒

凡喉中作癢難過不可喫茶酒湯水將薄荷二分麝香
一分作極細末吹入喉中待其氣通吐出涎水碗許然

後喫陳黃米湯半茶杯卽愈若不知者竟喫茶酒便不可救

一友人云山東某縣春月染一種異症人一時冷戰關心卽刻而斃竟無治法死者纍纍後遇一人云此名關心內釘傳一方用銀硃一錢白礬一錢爲細末老葱三根黃酒一大鍾以酒熬葱滾開沖調銀硃白礬細末溫服之

尙友山人曰凡人之忽爾暴亡者非痧卽疔其毒深入中人卽吳又可雜氣之說人多不知而失於救治丹臺玉案書載螺螄疔一條云惡寒發熱胸膈作悶身發紅

點如蚊迹者類乎傷寒此點起之於手沿至於心前其人發狂悶亂而斃不知者但以傷寒發斑治之百無一生也治法以三角針刺其紅點之首尾處出血外用鐵釘磨水敷之內服犀角地黄湯立愈予因此知牙痛之極有起疔毒者不知有疔急爲挑破出血而第以爲胃火大劑石膏清熱因至疔毒熾盛入心往往致斃史摺臣願體集書有云癰疽宜灸疔毒宜針明疔易治暗疔難療生於口耳眉目鼻者顯而易見生於身體四肢者令人難防及至發作每每悞認傷寒半日不治毒必走黃入心人卽昏憤若知覺早者急用拔針或磁鋒入

二三分許擠去惡血當插立馬回疔丹於針孔之內恐
立馬回疔丹一時難覓可用蝸牛連殼搗爛敷之或家
菊花根搗爛敷之內服梅花點舌丹或蟾酥丸一二服
俱用菊根汁和熱酒送下出汗卽愈屢見患此症者多
畏疼痛不肯針刺殊不知一染疔毒皮肉卽僵雖針亦
不覺痛須放膽速針切勿遲延而悞時刻也予見一書
有云凡疔之起必有其根其根除去其瘡自愈矣其根
在肩骨下四寸許用水洗淨細看卽有黑點子用針針
破出紫血或黃水亦可其瘡用帶鬚葱搗爛敷之凡疔
毒不治之必走心者內經云諸痛癢瘡皆屬於心況心

爲丁火而毒以疔名尤有氣類應求之義易謂水流濕火就燥不其然乎

蔣仲芳醫宗說約有黃耳赤膈類傷寒二症吳門戈氏專司傷寒有補天石集集中惟此二條類傷寒秘而不傳予於張孟如處得之

黃耳傷寒

耳中策策痛惡寒發熱脊強背直荆防敗毒散再添蟬蛻黃芩白芍紫金皮外治用苦參磨水或用猴姜根汁或用苦薄荷汁土木香汁滴入耳中

赤膈傷寒

胸赤腫痛發熱惡寒頭疼體痛荆防敗毒散加入黃芩
黃連瓜蒌元參赤芍升麻紫金皮大便秘實加大黃外
治用三稜針刺腫出血
尚友山人曰瘟有大頭捻頸等類此黃耳病卽疫氣由
鼻傳入之聚毒於耳者耳爲腎之開竅而耳之前後屬
少陽部位腎火爲相火少陽亦爲相火毒流注於此與
火合勢故病耳腫痛赤膈病卽疫氣由口鼻傳入之聚
毒於膈者疫氣可注於頸而爲大頭瘟可注於頸而爲
捻頸瘟安必不可注於耳而爲黃耳瘟注於膈而爲赤
膈瘟乎全要得其理則活潑潑地不必盡出昔人之所

今人患暑症歿而手足指甲或肢體青黯皆陰寒之症陸雲若評云陰陽壞症皆有之未可盡以爲寒凝也

論及而無不可爲昔人之所心印朱子濂溪贊云書不盡言圖不盡意其詔後來者豈淺鮮哉

青筋證

江含徵曰青筋症面青唇黑手足厥冷氣逆血衝使然醫者意中不先有此一症鮮不認作陰經傷寒也

王明德曰青筋脹一症卽俗所謂之烏沙脹倘誤認爲陰症藥而投之則斷於不救且爲症甚速凡得此等症候及陰症之不救者兩手足指甲皆青黯或盡青紫甚則頭面及通身皆紫黯緣其血敗積而成色故也龔雲林曰青筋之症原氣逆而血不行俾惡血上攻於



北京中醫藥大學圖書館

王養吾晰微補化全
書有煉石丹痧脹通

用

千年石即陳石灰水

飛一兩松根石即真

琥珀三錢

水骨石即白滑石水

飛二錢水滴為丸表

熱煩躁者青黛為衣

眩暈心悶者硃砂為

衣每服二錢垂頭蘆

聚湯下

心須臾不救未有退血之法不得不刺曲池其穴在肘

手腕中青筋頭上男左女右用砭針打之出去黑脈之

血即愈不須去血即服白虎丹神効

本草謂石灰辛溫性烈散血定痛

千年古石灰不拘多少刮去雜色泥土為細末水飛過

晒乾量可丸如梧桐子大每服五十丸看輕重加減燒

酒送下此藥能順氣散血化痰消滯治青筋初覺頭痛

惡心或腰痛或腹疼或遍身作痛不思飲食即進一服

當時血散若過三五日青筋已老多服取効又治心腹

痛及婦人崩漏帶下或因氣惱致病或久患赤白痢疾

或打撲損傷血不能散服之大効歌曰南方有沙症北



地患青筋多由七情起或是六淫成使氣不運用致血
不通行心慌痰喘急噎塞氣上升胸中痞滿悶心腹痛
無停眩暈眼黑暗頭痛耳常鳴憎寒復壯熱唇黑面頰
青四肢沉困倦百節苦酸疼渾身麻木痺手足厥冷并
飲食全不納惡心慌不寧莫把青筋打瘀血自然行專
治心腹痛又醫帶下崩不拘赤白痢打撲瘀血凝仙方
名白虎一服効通靈

王養吾痧書云己巳年不拘老幼男婦素常無病輒僵
仆厥冷呼吸脉息俱無口禁目翻須臾而死矣有陡然
心腹大痛滾地叫號面青唇黑不半日而死矣又有正

在做活無端手足麻痺舌縮涎流欲語不能出聲筋抽
冷汗而死矣更有稀奇怪病其症耳所未聞目所未覩
滿身青紅紫黑而死矣此外種種情狀難以悉舉任他
老手名醫何能識認誰敢用藥有不束手待斃者乎若
此者不治固死治不如法更速其死予書旣成針藥佐
理雖不敢擬上工十全其九亦得如中工之全六七俾
世人咸知痧脹之利害不致投劑之乖方庶使大地春
回天工人代寧不快哉按此卽雜氣之至毒而中藏者
王明德曰閩粵多瘴癘凡爲瘴頭所中之人自知身爲
受病急令人以磁鋒代刺或於額上或於眉叢或於兩

臂膊立出血升餘則瘡若其所出之血病而淺者紅而
多病而深者紫而少若紫黑而極少則染病極深乃瘳
而僅救者耳凡其土人每以得血稱賀如或不得其血
或得之艱澁最甚則咸謂不治及其死也其屍頭面或
多青黯或盡紫黑其手足指甲亦然若未死之前吐出
惡物或瀉下黑血穀道腫突或大腸突出等項症則又
肺癰腸風及中臟諸症所必然豈爲中砒鴆毒耶按此
謂瘳癘之毒非砒鴆也而無異於砒鴆在閩粵爲瘳癘
在他方爲雜氣但有甚有不甚耳

陰陽毒

金匱要略曰陽毒之爲病面赤斑斑如錦文咽喉痛吐
膿血五日可治七日不可治升麻鱉甲湯主之

陰毒之爲病面目青身痛如被杖咽喉痛五日可治
七日不可治升麻鱉甲湯去雄黃蜀椒主之

升麻鱉甲湯

升麻

鱉甲

當歸

甘草

雄黃

蜀椒

右六味以水四升煮取一升頓服之老小再服取汗

千金陽毒升麻湯升麻

半兩

當歸川椒雄黃桂枝

各一兩

每服五錢水一鍾半煎一盞溫覆手足取汗得吐亦

佳陰毒甘草方甘草升麻

各半兩

當歸川椒鱉甲

各一兩

服同前

王安道曰所敘證不過面目青身痛如被杖咽喉痛而

已并不言陰寒極甚之證所治方亦不過升麻甘草當

歸鱉甲而已并不用大溫大熱之藥是知仲景所謂陰

毒者非陰寒之病乃是感天地惡毒異氣入於陰經故

曰陰毒後人所敘陰毒只是內傷冷物或不正暴寒所

中或過服寒藥所變或內外俱傷於寒而成非天地惡

毒異氣所中與仲景所敘自是兩般豈可混論

趙以德曰按方書陽毒盡治以寒涼陰毒盡治以溫熱

藥劑如冰炭之異何乃仲景用一方治之蓋病形雖由陰陽發症論邪則一屬熱毒與血病也在陽經絡則面赤斑斑如錦文吐膿血在陰經絡則面青身如被杖此皆陰陽水火動靜之本象如此豈是寒熱之邪乎所以不分表裏俱以升麻解熱毒爲君當歸和血爲臣餘者佐之而已五日乃土之生數熱未極也尙可以治七日爲火之成數熱之極不惟滅其陰且火極亦自滅不可治矣

趙養葵曰此與傷寒論陽毒陰毒特異是感天地疫癘非常之氣沿家傳染所謂時疫症者是也

觀方內老小再服可見

李士材曰二症俱用升麻鱉甲湯在陽毒之熱反加蜀椒在陰毒之寒反去蜀椒其敘陽毒不過曰面赤咽疼唾膿血而已并不言元陽極熱之狀也其敘陰毒不過曰面青咽痛身如被杖而已并不言至陰極寒之狀也其所用藥不過升麻甘草鱉甲當歸而已并不用大熱大寒之劑也乃知仲景所謂陽毒者感天地惡毒之異氣入於陽經則爲陽毒入於陰經則爲陰毒故其立方但用解毒之品未嘗以桂附薑黃治陰芩連硝黃治陽也後世名家不深察仲景之旨遂以陽毒爲陽症之甚者而用寒涼陰毒爲陰症之甚者而用溫熱殊不知仲